

# Cingsih: Ciengq Go Diuq Foux Angqhoh Vahcuengh Gvangjbo Dendaiz Cingqsik Haiboq

## 靖西:唱歌跳舞庆祝壮语广播电台正式开播

2013 nienz 12 nyied 29 hauh, Cingsih Yen Vahcuengh Gvangjbo Dendaiz ndaej cingqsik haiboq, neix dwg gih raeuz dangqnae aen Vahcuengh Gvangjbo Dendaiz haiboq daih' it ndeu. Ngoenzde, Cingsih Yen gyoengq boux guh hong sinhvwnz caeuq 2000 lai boux ginzung angqfaengz doxcomz, doenggvaq yienj gij heiq gag bien gag yienj, youq yienhciegz caeuq ginzung gyauhliuz, soengq souhyinhgih daengj fuengsik, itheij angqhoh Cingsih Yen Vahcuengh Gvangjbo Dendaiz cingqsik haiboq.

Cingsih Yen Vahcuengh Gvangjbo Dendaiz aeu Vahdoj Vahcuengh baihnanz daeuj boq, moix ngoenz gyanghaet 6 diemj 25 faen hainduj boq, daengz doengxhaemh 11 diemj boq liux. Laeb miz lanzmuz dwg:《Vahcuengh Sinhvwnz》、《Vahcuengh Gohgi》、《Liengz Lauxsae Ganggoj》、《Ranz Bouxcuengh》、《Doeg Gawq Ndei》、《Dingq Fwen》、《Heiq Mbanjcuengh》. Cezmuz baugvat sinhvwnz, saengsik cwngvu, yinhyoz vwnzyi, vwnzva Mbanjcuengh. Haiboq Cingsih Yen Vahcuengh Gvangjbo Dendaiz, mboujdan ndaej fungfouq gij vwnzva swngghoz gyoengq ginzung henzbien Mbanjcuengh, lij doiq doicaenh hong baujhoh caeuq swnjcienz Vahcuengh miz yiyei gig daih.

(Yangz Liujcingh)



▲ Saimbwk caez ciengq diuzgo 《Siengj Ciengq Go Couh Ciengq》.



▲ Ciengq go diuq foux 《Angqvauvau》.

## Sinhlungz Siujyoz Yienj Heiq Angqhoh Yenzdan 新龙小学唱歌跳舞庆祝元旦

□ Ganh Sozvwenz Cinz Sansiu/甘说文 覃善笑

“Daengngoenz baez hwnj ngoenz moqmat, Yenzdan yat haeuj bi moq daengz; Cuengh Gun cungj hag raeuz angqfaengz,

Song vah caez doeng vunlai haenh.”

Gijneix dwg hot fwen danqhaenh hagdanz ndeu. 2013 nienz 12 nyied 30 hauh, Sawcuengh sawqniemh hagdanz—Vujsenh Yen Dungzlingj Cin Sinhlungz Siujyoz guh hozdung yienj heiq angqhoh yenzdan, gyoengq saeseng caez eu hot fwen neix. Ciengz heiq angqcoux bi moq neix cujdiz dwg “hungzyangz minzcuz vwnzva, ciengqyiengj gij go seizdaih”. Guh hozdung ngoenzde, daj aen cezmuuz gagciengq 《Daengngoenz Seiziq Siujbahlangz》 haidaeuz, ciepdwk miz 《Guhhong Cei Miznaj》 daengj haujlai aen cezmuuz Vahcuengh、Vahgun. Gyoengq doengzhag ciengq go ndei dingq dangqmaz, diuqfoux ndeiyawj dangqmaz. Daengx hagdanz lauxsae、doengzhag, lij miz

haujlai vunz ndaw ranz hagseng cungj haenhndei, dopfwngz robrob. Heiq siujbinj Vahcuengh 《Haenh Hagdanz Raeuz》 ceiq ndeiyawj: Seiq boux cangheiq iq yungh gamjsouh swheij, danqhaenh Sinhlungz Siujyoz guh hong Cuengh Gun song saw vah sonhag aeu ndaej cingzcik hung, boux-yienj lij caeuq bouxyawj doxcam doxdap, ciengzmienh gikdoengh vunz caeuq gujvuj vunz lailai.

Baez hozdung neix, baijok gij cingsaenz funghmau minzcuz hagdanz, coicaenh gyoengq doengzhag haenqrengz baenaj.



▲ 《Caezgya guhdaih daeuj》, ciengq go youh diuq foux.



▲ Gagciengq singsensen, daengngoenz hwnjrenren.



▲ Ciengjcam ronghsag, cing-saenz gvaekgvaek.



▲ Gyoengq bouxyienjyenz yienj heiq hawj nungzminz yawj.



▲ Mienx-ngaenz sij doiq hawj nungzminz.

## Bwzswz: “Seiq Roengz Mbanj” Angqcoux Bi Moq Bang Nungzminz

### 百色:“四下乡”迎新助农

2013 nienz 12 nyied 31 hauh, Bwzswz Si Yougyangh Gih Cwngfuj haidoengh bi 2014 angqcoux bimoq “seiq roengz mbanj” bang nungzminz hozdung, cujiz nungzyez、vwnzva、gohgi、swhfaz、veiswnggh、giswnggh、vwnzlenz、fulenz、donzveij、yinzfangz daengj lai aen bumwnz gyoengq gunghcoz yinzyenz haeuj lajmbanj ndawrungh bae, hawj nungzminz guh nungzyez swngghanj gisuz cijdauj, mienxngaenz soengq doiq hawj nungzminz, yienj heiq hawj nungzminz yawj, bang nungzminz dap ngeiz gej nanz, soengq fukheiq caeuq vaiqvued hawj nungzminz.

(Veiz Vancungh)